



志第三 晉書十三

御撰

天文下

月五星犯列舍

經星

變附見

妖星客星

星流

隕 雲氣

月五星犯列舍

經星變附見

魏文黃初四年三月癸卯月犯心大星占
曰心為天王位王者惡之六月甲申太白
晝見案劉向五紀論曰太白少陰弱不得
專行故以己未為界不得經天而行經天

則書見其占爲兵喪爲不臣爲更王疆國
弱小國彊是時孫權受魏爵號而稱兵距
守其十二月景子月犯心火星占同上
五年十月乙卯太白書見占同上又歲星
入太微逆行積百四十九日乃出占曰五
星入太微從右入三十日以上人主有大
憂一曰有赦至七年五月帝崩明帝卽位
大赦天下六年五月壬戌熒惑入太微至
壬申與歲星相及俱犯右執法至癸酉乃

出占曰從右入三十日以上人主有大憂
又日月五星犯左右執法大臣有憂一曰
執法者誅金火尤甚十一月皇子東武陽
王鑿薨七年正月驃騎將軍曹洪免爲庶
人四月征南大將軍夏侯薨五月帝崩
蜀記稱明帝問黃權曰天下鼎立何地爲
正對曰當驗天文往者熒惑守心而文帝
崩吳蜀無事此其徵也案三國史並無熒
惑守心之文疑是入太微八月吳遂圍江

夏寇襄陽大將軍宣帝救襄陽斬吳將張
霸等兵喪更王之應也

明帝太和五年五月熒惑犯房占曰房四
星股肱臣將相位也月五星犯守之將相
有憂其七月車騎將軍張郃追諸葛亮為
亮所害十二月太尉華歆薨其十一月乙
酉月犯軒轅大星占曰女主憂

六年三月乙亥月又犯軒轅大星十一月
景寅太白晝見南斗遂歷八十餘日恒見

占曰吳有兵明年孫權遣張彌等將兵萬
人錫授公孫文懿為燕王文懿斬彌等虜
其衆青龍三年正月太后郭氏崩

青龍三年三月辛卯月犯輿鬼輿鬼主斬
殺占曰人多病國有憂又曰大臣憂是年
夏及冬大疫四年五月司徒董昭薨其五
月丁亥太白晝見積三十餘日以晷度推
之非秦魏則楚也是時諸葛亮據渭南宣
帝與相持孫權寇合肥又遣陸議孫昭等

入淮泗天子親東征蜀本秦地則為秦魏
及楚兵悉起矣其七月己巳月犯楗閉占
曰有火災三年七月崇華殿災三年六月
丁未填星犯井越戌太白又犯之占曰
凡月五星犯井鉞悉為兵災一曰斧鉞用
大臣誅七月己丑填星犯東井距星占曰
填星入井大人憂行近距為行陰其占曰
大水五穀不成景初二年夏大水傷五穀
其年十月壬申太白晝見在尾歷二百餘

日恒晝見占曰尾為燕有兵十二月戊辰
月犯鉤鈐占曰王者憂

四年閏正月己巳填星犯井鉞三月癸卯
填星犯東井己巳太白與月加景晝見五
月壬寅太白犯畢左股第一星占曰畢為
邊兵又主刑罰九月涼州塞外胡阿畢師
使侵犯諸國西域校尉張就討之斬首捕
虜萬計其年七月甲寅太白犯軒轅大星
占曰女主憂景初二年皇后毛氏崩

景初元年二月乙酉月犯房第二星占曰將軍有憂其七月司徒陳矯薨二年四月司徒韓暨薨其七月辛卯太白晝見積二百八十餘日時公孫文懿自立為燕王署置百官發兵距守宣帝討滅之

二年二月己丑月犯心距星又犯中央大星五月乙亥月又犯心距星及中央大星案占曰王者惡之犯前星太子有憂三年正月帝崩太子立卒見廢其年十月甲午

月犯箕占曰將軍死正始元年四月車騎將軍苗稚薨其閏十一月癸丑月犯心中央大星少帝正始元年四月戊午月犯昴東頭第一星十月庚寅月又犯昴北第一星占曰月犯昴胡不安二月六月鮮卑阿妙兒等寇西方敦煌太守王延破之斬二萬餘級三年又斬鮮卑大帥及千餘級二年九月癸酉月犯輿鬼西北星三年二月丁未又犯西南星占曰有錢令一曰大

臣憂三年二月太尉滿寵薨四年正月帝加元服賜羣臣錢各有差

四年十月十一月月再犯井鉞是月宣帝討諸葛恪恪棄城走五年二月曹爽征蜀五年十一月癸巳填星犯亢距星占曰諸侯有失國者

七年七月丁丑月犯左角占曰天下有兵左將軍死七月乙亥熒惑犯畢距星占曰有邊兵一曰刑罰用

九年正月辛亥月犯亢南星占曰兵起一曰將軍死七月癸丑填犯捷閉占曰王者不宜出宮下殿嘉平元年天子謁陵宣帝奏誅曹爽等天子野宿於是失勢

嘉平元年六月壬戌太白犯東井距星占曰國失政大臣為亂四月辛巳太白犯輿鬼占曰大臣誅一曰兵起

二年三月巳未太白又犯井距星三年七月壬凌與楚王彪有謀皆伏誅人主遂卑

吳孫權赤烏十三年夏五月日北至熒惑
逆行入南斗秋七月犯魁第三星而東漢
晉春秋云逆行案占熒惑入南斗三月吳
王死一曰熒惑逆行其地有死君太和二
年權薨是其應也故國志書於吳是時王
凌謀立楚王彪謂斗中有星當有暴貴者
以問知星人浩詳詳疑有故欲悅其意不
言吳有死喪而言淮南楚分吳楚同占當
有王者興故凌計遂定

嘉平二年十二月景申月犯輿鬼

三年四月戊寅月犯東井五月甲寅月犯

亢距星占曰軍將死一曰為兵是月王凌

楚王彪等誅七月皇后甄氏崩四年三月

吳將為寇鎮東將軍諸葛誕破走之其年

七月己巳月犯輿鬼九月乙巳又犯之十

月癸未熒惑犯亢南星占曰臣有亂四年

十一月丁未月又犯鬼積尸五年六月戊

午太白犯角占曰羣臣有謀不成庚辰月

犯箕星占曰將軍死七月月犯井鉞景午
月又犯鬼西北星占曰國有憂十一月癸
酉月犯東井距星占曰將軍死正元元年
正月鎮東將軍毋丘儉揚州刺史文欽反
兵俱敗誅死二月李豐及弟翼后父張緝
等謀亂事泄悉誅皇后張氏廢九月帝廢
為齊王蜀將姜維攻隴西車騎將軍郭淮
討破之

高貴卿公正元二年二月戊午熒惑犯東

井北轅西頭第一星甘露元年七月乙卯
熒惑犯東井鉞星壬戌月又犯鉞星八月
辛亥月犯箕吳廢孫亮 太平元年九月
壬辰太白犯南斗吳志所書也占曰太白
犯斗國有兵大臣有反者其明年諸葛誕
反又明年孫綝廢亮吳魏並有兵事也
甘露元年九月丁巳月犯東井二年六月
巳酉月犯心中央大星八月壬子歲星犯
井鉞九月庚寅歲星逆行乘井鉞十月景

寅太白犯亢距星占曰逆臣爲亂人君憂
景元元年五月有成濟之變及諸葛誕誅
皆其應也

二年三月庚子太白犯東井占曰國失政
大臣爲亂是夜歲星又犯東井占曰兵起
至景元元年高貴鄉公敗

三年八月壬辰歲星犯輿鬼鎮星占曰奔
鑽用大臣誅四年四月甲申歲星又犯輿
鬼東南星占曰鬼東南星主兵木入鬼大

臣誅景元元年殺尚書王經

元帝景元元年二月月犯建星案占曰五
星犯建星大臣相譖是後鍾會鄧艾破蜀
會譖艾

二年四月熒惑入太微犯右執法占曰人
主有大憂一云大臣憂

四年十月歲星守房占曰將相憂一云有
大赦明年鄧艾鍾會皆夷滅赦蜀土五年
帝遜位

武帝咸寧四年九月太白當見不見占曰
是謂失舍不有破軍必有亡國是時羊祜
表求伐吳上許之五年十一月兵出太白
始夕見西方太康元年三月大破吳軍孫
皓面縛請罪吳國遂亡

太康八年三月熒惑守心占曰王者惡之
太熙元年四月乙酉帝崩

惠帝元康三年四月熒惑守太微六十日
占曰諸侯三公謀其上必有斬臣一曰天

亡國是者太白守畢至是百餘日占曰
有急令之憂一曰相死又為邊境不安後
賈后陷殺太子

六年十月乙未太白晝見九年六月熒惑
守心占曰王者惡之八月熒惑入羽林占
曰禁兵太起其後帝見廢為太上皇俄而
三王起兵討趙王倫倫悉遣中軍兵相距
累月

永康元年三月中台星拆太白晝見占曰

台星失常三公憂太白晝見為不臣是月
賈后殺太子趙王倫尋廢殺后斬司空張
華其五月熒惑入南斗占曰宰相死兵大
起斗又吳分野是時趙王倫為相明年篡
位三公與師誅之大安二年石冰破揚州
其八月熒惑入箕占曰人主失位兵起明
年趙王倫篡位改元二年二月太白出西
方逆行入東井占曰國失政大臣為亂是
時齊王冏起兵討趙王倫倫滅冏擁兵不

朝專權淫奢明年誅死

永寧元年自正月至于閏月五星互經天
縱橫無常星傳曰日陽君道也星陰臣道
也日出則星亡臣不得專也晝而星見于
上者為經天其占為不臣為更王今五星
悉經天天變所未有也石氏說曰辰星晝
見其國不亡則大亂是後台鼎方伯互執
大權二帝涿亡遂至六夷更王迭據華夏
亦載籍所未有也其四月歲星晝見五月

太白晝見占同前七月歲星守虛危占曰
木守虛危有兵憂虛危齊分一曰守虛饑
守危徃後煩多下屈竭辰星入太微占曰
為內亂一曰羣臣相殺太白守右掖門占
曰為兵為亂為賊八月戊午填星犯左執
法又犯上相占曰上相憂熒惑守昴占曰
趙魏有災辰星守輿鬼占曰秦有災九月
丁未月犯左角占曰人主憂一曰左衛將
軍死天下有兵

二年四月癸酉歲星晝見占曰為臣彊初
齊王罔定京都因留輔政遂專傲無君是
月成都河間檄長沙王又討之罔又交戰
攻焚宮闕罔兵敗夷滅又殺其兄上軍將
軍寔以下二十餘人太安二年成都攻長
沙於是公私饑困百姓力屈
太安二年二月太白入昴占曰天下擾兵
大起七月熒惑入東井占曰兵起國亂是
秋太白守太微上將占曰上將以兵亡是

年冬成都河間攻洛陽八月長沙王奉帝
出距二王二年東海王越執長沙王又張
方又殺之

三年正月熒惑入南斗占同永康七月左
衛將軍陳眎率眾奉帝伐成都六軍敗績
兵偏乘輿是時天下盜賊羣起張昌尤盛
永興二年七月庚申太白犯角亢經房心
靡尾箕九月入南斗占曰犯角天下大戰
犯亢有大兵人君憂入房心為兵喪犯尾

箕女主憂一曰天下大亂入南斗有兵喪
一曰將軍為亂其所犯守又兗豫幽冀揚
州之分野是年七月有蕩陰之後九月王
浚殺幽州刺史和演攻鄴鄴潰於是兗豫
為天下兵衝陳敏又亂揚土劉元海石勒
李雄等並起微賤跨有州郡皇后羊氏數
被幽廢皆其應也

二年四月景子太白犯狼星占曰大兵起
九月歲星守東井占曰有兵井又秦分野

是年荀晞破公師蕃張方破范陽王虓關
西諸將攻河間王顥奔走東海王迎殺之
光熙元年四月太白失行自翼入尾箕占
曰太白失行而北是謂反生不有破軍必
有屠城五月汲桑攻鄴魏郡太守馮嵩出
戰大敗桑遂害東燕王騰殺萬餘人焚燒
魏時宮室皆盡其九月丁未熒惑守心占
曰王者惡之己亥填星守房心占曰填守
房多禍喪守心國內亂天下赦是時司馬

越專權終以無禮破滅內亂之應也十一
月帝崩懷帝卽位大赦天下

懷帝永嘉元年十二月丁亥星流震散按
劉向說天官列宿在位之象其衆小星無
名者衆庶之類此百官衆庶將流散之象
也是後天下大亂百官萬姓流移轉死矣
二年正月庚午太白伏不見二月庚子始
晨見東方是謂當見不見占同上條其後
破軍殺將不見勝數帝崩虜庭中夏淪覆

三年正月庚子熒惑犯紫微占曰當有野
死之王又爲火燒宮是時太史令高堂冲
奏乘輿宜遷幸不然必無洛陽五年六月
劉曜王彌入京都焚燒宮廟執帝歸平陽
三年填星久守南斗占曰填星所居久者
其國有福是時安東將軍琅邪王始有揚
土其年十一月地動陳卓以爲是地動應
也

五年十月熒惑守心六年六月丁卯太白

犯太微占曰兵入天子庭王者惡之七月
帝崩于寇庭天下行服大臨

元帝太興元年七月太白犯南斗占曰吳
越有兵大人憂

二年二月甲申熒惑犯東井占曰兵起貴
臣相戮八月己卯太白犯軒轅大星占曰
後宮憂

三年五月戊子太白入太微又犯上將星
占曰天子自將上將誅九月太白犯南斗

十月己亥熒惑在東井居五諸侯南踟躕
留積三十日占曰熒惑守井二十日以上
大人憂守五諸侯諸侯有誅者永昌元年
三月王粲率江荆之衆來攻京都六軍距
戰敗績人主謝過而已於是殺護軍將軍
周覲尚書令刁協驃騎將軍戴若思又鎮
北將軍劉隗出奔四月又殺湘州刺史譙
王司馬承鎮南將軍甘卓閏十二月帝崩
明帝太監三年正月熒惑逆行入太微占

曰爲兵喪王者惡之閏八月帝崩後二年
蘇峻反攻焚宮室太后以憂偪崩天子幽
劫于石頭城遠近兵亂至四年乃息
咸帝咸和六年正月景辰月入南斗占曰
有兵是月石勒殺略婁武進二縣人明年
石勒衆又抄略南涉海虞其十一月熒惑
守胃昴占曰趙魏有兵八年七月石勒死
石季龍自立是時雖二石僭號而其彊弱
常占於昴不闕太微紫宮也

八年三月己巳月入南斗與六年占同其
年七月石勒死彭彪以譙石生以長安郭
權以秦州並歸順於是遣督護喬球率衆
救彪彪敗球退又石季龍石斌攻滅生權
其七月熒惑入昴占曰胡王死一曰趙地
有兵是月石勒死石季龍多所攻沒八月
月又犯昴占曰胡不安

九年三月己亥熒惑入輿鬼犯積尸占曰
兵在西北有沒軍死將六月八月月又犯
昴是時石弘雖襲勒位而石季龍擅威橫
暴十一月廢弘自立遂幽殺之

咸康元年二月己亥太白犯昴占曰兵起
歲中旱四月石季龍略騎至歷陽加司徒
王導大司馬治兵列戍衝要是時石季龍
又圍襄陽六月旱其年二月景戌月入昴
占曰胡王死八月戌戌熒惑入東井占曰
無兵兵起有兵兵止十一月月犯昴
二年正月辛亥月犯房南第二星八月月

又犯昴九月庚寅太白犯南斗因晝見占
曰斗為宰相又揚州分金犯之死喪之象
晝見為不臣又為兵喪其後石季龍僭稱
天王發衆七萬四年二月自隴西攻段遼
于薊又襲慕容皝於棘城不克皝擊破其
將麻秋并虜段遼殺之

三年七月己酉月犯房上星八月熒惑入
輿鬼犯積尸甲戌月犯東井距星九月戊
子月犯建星

四年四月己巳太白晝見在柳占曰為兵
為不臣明年石季龍大寇河南於是內外
戒嚴其五月戊戌熒惑犯右執法占曰大
臣死執政者憂九月太白又犯右執法案
占五星災同金水尤甚十一月戊子太白
犯房上星占曰上相憂

五年四月乙未月犯畢距星占曰兵起七
月己酉月犯房上星占曰將相憂是月庚
申丞相王導薨庾冰代輔政八月太尉郗

鑿薨又有沔南邾城之敗百姓流亡萬餘
家六年正月征西大將軍庾亮薨

六年三月甲辰熒惑犯太微上將星占曰
上將憂四月丁丑熒惑犯右執法占曰執
政者憂六月乙亥月犯牽牛中央星占曰
大將憂是時尚書令何充為執法有譴欲
避其咎明年求為中書令其四月景午太
白犯畢距星占曰兵革起一曰女主憂六
月乙卯太白犯軒轅大星占曰女主憂七

年三月皇后杜氏崩

七年三月壬午月犯房四月己丑太白入

輿鬼五月太白晝見八月辛丑月犯輿鬼

八年六月熒惑犯房上第二星占曰次相

憂八月壬寅月犯畢占曰下犯上兵革起

十月月又掩畢大星占同上其建元元年

車騎將軍庾冰薨庾翼大發兵謀伐石季

龍專制上涼朝廷憚之

康帝建元二年正月壬午太白入昴占曰

趙地有兵又曰天下兵起四月乙酉太白
書見是年石季龍殺其子邃又遣將寇沒
狄道及屯薊東謀慕容晃三年歲星犯天
關安西將軍庾翼與兄冰書曰歲星犯天
關占云關梁當分比來江東無他故江道
亦不艱難而石季龍頻年再閉關不通信
使此復是天公憤憤無皂白之徵也其閏
月乙酉太白犯斗占曰為喪天下受爵祿
九月帝崩太子立大赦賜爵

穆帝永和元年正月丁丑月入畢占曰兵
大起戊寅月犯天關占曰有亂臣更天子
之法五月辛巳太白晝見在東井占曰為
臣彊秦有兵六月辛丑月入太微犯屏西
南星占曰輔臣有免罷者七月八月月皆
犯畢占同上巳未月犯輿鬼占曰大臣有
誅九月庚戌月犯畢是年初庾翼在襄陽
七月翼疾將終輒以子爰之為荊州刺史
代已任爰之尋被廢明年桓溫又輒率眾

伐蜀執李勢送至京都蜀本秦地也

二年二月壬子月犯房上星四月景戌月

又犯房上星八月壬申太白犯左執法

三年正月壬午月犯南斗第五星占曰將

軍死近臣去五月壬申月犯南斗第四星

因入魁占曰有兵一曰有大赦六月月犯

東井距星占曰將軍死國有憂戊戌月犯

五諸侯占曰諸侯有誅九月庚寅太白犯

南斗第五星占曰為喪為兵

四年七月景申太白犯左執法甲寅月犯

房丁巳月入南斗犯第二星乙丑太白犯

左執法占悉同上十月甲辰月犯亢占曰

兵起將軍死十一月戊戌月犯上将星三

年六月大赦是月陳遼征壽春敗而還七

月氐蜀餘寇反亂益土九月石季龍伐涼

州五年征北大將軍褚裒卒

四年四月太白入昴是時戎晉相侵趙地

連兵尤甚七月太白犯軒轅占曰在趙及

為兵喪甲寅月犯房十月甲戌月犯亢占
曰兵起將軍死八月石季龍太子宣殺弟
韜宣亦死其十一月戊戌月犯上将星五
年正月石季龍僭號稱皇帝尋死

五年四月丁未太白犯東井占曰秦有兵
九月戊戌太白犯左角占曰為兵十月月
犯昴占曰胡有憂將軍死是年八月褚裒
北征兵敗十月關中二十餘壁舉兵內附
石遵攻沒南陽十一月冉閔殺石遵又盡

殺胡十餘萬人於是趙魏大亂十二月褚
裒薨八年劉顯苻健慕容雋並僭號躬浩
北伐敗績見廢

六年二月辛酉月犯心大星占曰大人憂
又豫州分野也丁丑月犯房占曰將相憂
六月己丑月犯昴占同上乙未月犯五諸
侯占同上七月壬寅月始出西方犯左角
占曰大將軍死一曰天下有兵丁未月犯
箕占曰將軍死景寅熒惑犯鉞星占曰大

臣有誅八月辛卯月犯左角太白晝見在
南斗月犯右執法占並同上是歲司徒蔡
謨免為庶人

七年二月太白犯昴占同上三月乙卯熒
惑入輿鬼犯積尸占曰貴人有憂五月乙
未熒惑犯軒轅大星占曰女主憂太白入
畢口犯左股占曰將相當之六月乙亥月
犯箕占曰國有兵景子月犯斗丁丑熒惑
入太微犯右執法八月庚午太白犯軒轅

戊子太白犯右執法占悉同上七年劉顯
殺石祗及諸將帥山東大亂疾疫死亡

八年三月戊戌月犯軒轅大星癸丑月入
南斗犯第二星五月月犯心星六月癸酉
月犯房七月壬子歲星犯東井距星占曰
內亂兵起八月戊戌熒惑入輿鬼占曰忠
臣戮死景辰太白入南斗犯第四星占曰
將為亂一曰丞相免

九年二月乙巳月入南斗犯第三星三月

戊辰月犯房八月歲星犯輿鬼東南星占
曰兵起是時帝幼沖母后稱制將相有隙
兵革連起慕容雋僭號稱燕王攻伐不休
十年正月己卯月蝕昴星占曰趙魏有兵
癸酉填星奄鉞星占曰斧鉞用三月甲申
月犯心大星占曰王者惡之七月庚午太
白晝見昴度推之災在秦鄭九月辛酉太
白犯左執法是時栢温擅命朝臣多見迫
脅四月温伐符健破其峽柳軍十二月慕容

慕容攻齊

十一年三月辛亥月奄軒轅占同上四月
庚寅月犯牛宿南星占曰國有憂八月己
未太白犯天江占曰河津不通

十二年六月庚子太白晝見在東井占如
上己未月犯鉞星八月癸酉月奄建星九
月戊寅熒惑入太微犯西蕃上將星十一
月丁丑熒惑犯太微東蕃上將星十二年
十一月齊城陷執段龕殺二千餘人永和

三年鮮卑侵略河與升平元年慕容雋遂
據臨漳盡有幽并青冀之地緣河諸將奔
散河津隔絕時權在方伯九服交兵

升平元年四月壬子太白入輿鬼丁亥月
奄并南轅西頭第二星占曰秦地有兵一
曰將死六月戊戌太白晝見在軫占同上
軫是楚分野壬子月犯畢占曰為邊兵七
月辛巳熒惑犯天江占曰河津不通十一
月歲星犯房占曰豫州有災其年五月符

堅殺符生而立十二月慕容雋入屯鄴二
年八月豫州刺史謝奕薨

二年十二月辛卯填星犯軒轅大星占曰
人主惡之甲午月犯東井六月辛酉月犯
房十月己未太白犯哭星占曰有大哭泣
三年正月壬辰熒惑犯楗閉星案占曰人
主憂三月乙酉熒惑逆行犯鉤鈴案占王
者惡之六月太白犯東井七月乙酉熒惑
犯天江景戌太白犯輿鬼占悉同上戊子

月犯牽牛中央大星占曰牽牛天將也犯中央大星將軍死八月丁未太白犯軒轅大星甲子月犯畢大星占曰為邊兵一曰下犯上三年十月諸葛攸舟軍入河敗績豫州刺史謝萬人朝眾潰而歸萬除名十一月司徒會稽王以郗曇謝萬二鎮敗求自貶三等四年正月慕容雋死子暉代立慕容恪殺其尚書令陽騫等

四年正月乙亥月犯牽牛中央大星六月辛亥辰星犯軒轅占曰女主憂巳未太白入太微右掖門從端門出占曰貴奪勢一曰有兵又曰出端門臣不臣八月戊申太白犯氐占曰國有憂景辰熒惑犯太微西蕃上將星九月壬午太白入南斗口犯第四星占曰為喪有赦天下受爵祿十二月甲寅熒惑犯房景寅太白晝見庚寅月犯鍵閉占曰人君惡之

五年正月乙巳填星逆行犯太微五月壬

寅月犯太微庚戌月犯建星占曰大臣相
謀是時斛浩敗績卒致遷徙其月辛亥月
犯牽牛宿占曰國有憂六月癸亥月犯氐
東北星占曰大將當之五年正月北中郎
將郗曇薨五月帝崩哀帝立大赦賜爵褚
后失勢七月慕容恪攻冀州刺史呂護於
野王護奔滎陽是時相溫以大衆次宛聞
護敗乃退

五年六月癸酉月奄氐東北星占曰大將
軍當之九月乙酉月奄畢占曰有邊兵十
月丁未月犯畢大星占曰下犯上又曰有
邊兵八月范汪廢隆和元年慕容暉遣將
寇河陰

哀帝興寧三年七月庚戌月犯南斗占曰
女主憂歲星犯輿鬼占曰人君憂十月太
白晝見在亢占曰亢為朝廷有兵喪為臣
彊明年五月皇后庾氏崩

海西太和二年正月太白入昴五年慕容

暉為符堅所滅又據司冀幽并四州

六年閏月熒惑守太微端門占曰天子亡國又曰諸侯三公謀其上一曰有斬臣辛卯月犯心大星占曰王者惡之十一月相温廢帝并奏誅武陵王簡文不許温乃徙之新安皆臣彊之應也

簡文咸安元年十二月辛卯熒惑逆行入太微二年三月猶不退占曰國不安且憂是時帝有相温之逼

二年五月丁未太白犯天關占曰兵起歲星形色如太白占曰進退如度姦邪息變色亂行主無福歲星於仲夏當細小而不明此其失常也又為臣彊六月太白晝見在七星乙酉太白犯輿鬼占曰國有憂七月帝崩桓温以兵威擅權將誅王坦之等內外迫脅又庾希入京城盧悚入宮並誅滅之

孝武寧康元年 正月戊申月奄心大星案

占曰災不在王者則在豫州一曰主命惡
之三月景午月奄南斗第五星占曰大臣
有憂死亡一曰將軍死七月桓溫薨九月
癸巳熒惑入太微是時女主臨朝政事多
缺

二年閏月己未月奄牽牛南星占曰左將
軍死十二月甲申太白晝見在氐氏兖州
分野三年五月景午北中郎將王坦之薨
三年六月辛卯太白犯東井占曰秦地有

兵九月戊申熒惑奄左執法占曰執法者
死太元元年苻堅破涼州二年十月尚書
令王彪之卒

太元元年四月景戌熒惑犯南斗第三星
景申又奄第四星占曰兵大起中國饑一
曰有赦八月癸酉太白晝見在氐氏兖州
分野九月熒惑犯哭泣星遂入羽林占曰
天子有哭泣事中軍兵起十一月己未月
奄氏角占曰天下有兵一曰國有憂

二年二月癸酉守羽林占曰禁兵大起九月壬午太白晝見在角角兗州分野升平元年五月大赦三年八月秦人寇樊鄧襄陽彭城四年二月襄陽陷朱序沒四月魏興陷賊聚廣陵三河衆五六萬於是諸軍外次衝要丹陽尹屯衛京都六月兗州刺史謝玄討賊大破之是時中外連兵比年荒儉

四年十一月丁巳太白犯哭星占曰天子

有哭泣事

五年七月景子辰星犯軒轅占曰女主當之九月癸未皇后王氏崩

六年九月景子太白晝見

七年十一月太白又晝見在十占曰吳有兵喪

八年四月甲子太白又晝見在參占曰魏有兵喪是月桓冲征沔漢楊亮伐蜀並拔城略地八月苻堅自將號百萬九月攻沒

壽陽十月劉牢之破苻堅將梁成斬之殺
獲萬餘人謝玄等又破苻堅於淝水斬其
弟融堅大衆奔潰九年六月皇太后褚氏
崩八月謝玄出屯彭城經略中州矣
九年七月景戌太白晝見十一月丁巳又
晝見

十年四月乙亥又晝見于畢昴占曰魏國
有兵喪是時苻堅大衆奔潰趙魏兵連相
攻堅為姚萇所殺

十一年三月戊申太白晝見在東井占曰
秦有兵臣彊六月甲申又晝見于輿鬼占
曰秦有兵時魏姚萇苻登連兵相征不息
甲午歲星晝見在胃占曰曾有兵臣彊十
二年慕容垂寇東阿翟遼寇河上姚萇假
號安定苻登自立隴上呂光竊據涼土
十二年六月癸卯太白晝見在柳十月庚
午太白晝見在斗
十三年正月景戌又晝見十二月癸惑在

角亢形色猛盛占曰熒惑失其常吏且棄其法諸侯亂其政自是後慕容垂翟遼姚萇苻登慕容永並阻兵爭疆十四年正月彭城妖賊又稱號於皇立劉牢之破滅之三月張道破合鄉圍泰山向欽之擊走之是年翟遼又攻沒滎陽侵略陳項于時政事多弊君道陵遲矣

十四年四月乙巳太白晝見于柳六月辛卯又晝見于冀九月景安又晝見于軫十

二月熒惑入羽林占並同上十五年翟遼掠司寇衆軍累討不尅慕容垂又跨略并冀等州七月旱八月諸郡大水交州又蝗十五年九月癸未熒惑入太微十月太白入羽林

十六年四月癸卯朔太白晝見十一月癸巳月奄心前星占曰太子憂是時太子常有篤疾

十七年七月丁丑太白晝見十月丁酉又

晝見

十八年六月又晝見

十九年五月又晝見于柳六月辛酉又晝見于輿鬼九月又見于軫

二十年六月熒惑入天囷占月大饑七月丁亥太白晝見在太微占曰太白入太微國有憂晝見為兵喪十二月己巳月犯樞閉及東西咸占曰樞閉司心腹喉舌東西咸主陰謀

二十一年二月壬申太白晝見三月癸卯太白連晝見在羽林占曰有彊臣有兵喪中軍兵起三月太白晝見于胃占曰中軍兵起四月壬午太白入天囷占曰為饑六月歲星犯哭泣星占曰有哭泣事是年九月帝崩隆安元年王恭等舉兵脅朝廷於是內外戒嚴殺王國寶以謝之及連歲水旱三方動眾人饑

安帝隆安元年正月癸亥熒惑犯哭泣星

占曰有哭泣事四月丁丑太白晝見在東
井占曰秦有兵喪六月姚興攻洛陽却恢
遣兵救之冬姚萇死子略代立魏王圭即
位於中山其八月熒惑守井鉞占曰大臣
有誅

二年六月戊辰攝提移度失常歲星晝見
在胃兖州分野是年六月却恢遣鄧啓方
等以萬人伐慕容寶於滑臺敗而還閏月
太白晝見在羽林十一月犯東上相

三年五月辛酉月又奄東上相辛未辰星
犯軒轅大星占悉同上二年九月庚楷等
舉兵表誅王愉等於是內外戒嚴三年六
月洛陽沒于寇桓玄破荆雍州殺殷仲堪
等孫恩聚眾攻沒會稽殺內史

四年六月辛酉月犯哭泣星

五年正月太白晝見自去年十二月在斗
書見至于是月乙卯案占災在吳越七月
癸亥大角星散搖五色占曰王者流散丁

卯月犯天關占曰王者憂九月庚子熒惑
犯少微又守之占曰處士誅十月甲子月
犯東次相其年七月太皇太后李氏崩十
月妖賊大破高雅之於餘姚死者十七八
五年孫恩攻侵郡縣殺內史至京口進軍
蒲洲於是內外戒嚴恩遣別將攻廣陵殺
三千餘人退據郁洲是時劉裕又追破之
九月桓玄表至逆旨陵上十月司馬元顯
大治水軍將以伐玄元興元年正月盧循
自稱征虜將軍領孫恩餘眾略有永嘉晉
安之地二月帝戎服遣西軍三月桓玄尅
京都殺司馬元顯放太傅會稽王道子
元興元年三月戊子太白犯五諸侯因晝
見占曰諸侯有誅七月戊寅熒惑在東井
熒惑犯輿鬼積尸占並同上八月景寅太
白奄右執法九月癸未太白犯進賢占曰
進賢者誅

三年二月歲星犯西上將六月甲辰月奄

斗第四星占曰大臣誅不出三年八月癸丑太白犯房北第二星九月巳丑歲星犯進賢熒惑犯西上將十月甲戌太白犯泣星十一月丁酉熒惑犯東上相十二月乙巳月奄軒轅第二星占悉同上升平元年冬魏破姚興軍二年十二月恒亥篡位放遷帝后於尋陽以永安何皇后爲零陵君三年二月劉裕盡誅桓氏三年正月戊戌熒惑逆行犯太微西上相

占曰天子戰於野上相死二月景辰熒惑逆行在左執法西北占曰執法者誅四月甲午月奄軒轅第二星五月壬申月奄斗第二星填星入羽林占並同上是年二月景辰劉裕殺桓脩等三月巳未破走桓玄遣軍西討辛巳誅左僕射王愉桓玄劫天子如江陵五月亥下至崢嶸洲義軍破滅之桓振又攻沒江陵幽劫天子七月永安何皇后崩

義熙元年三月壬辰月奄左執法占同上
丁酉月奄心前星占曰豫州有災太白犯
東井占曰秦有兵七月庚辰太白晝見在
翼軫占曰為臣彊荆州有兵喪八月丁巳
犯斗第一星占曰天下有兵一曰大臣憂
九月甲子熒惑犯少微占曰處士誅庚寅
熒惑犯右執法癸卯熒惑犯左執法占並
同上十一月景戌太白犯鉤鈴占曰喉舌
憂十二月己卯歲星犯天關占曰有兵亂

河津不通十一月荆州刺史魏詠之薨二
年二月司馬國璠等攻沒弋陽四月姚興
伐仇池公楊盛擊走之九月益州刺史司
馬榮期為其叅軍楊承祖所害三年十二
月司徒揚州刺史王謐薨四年正月太保
武陵王遵薨三月左僕射孔安國卒自後
政在劉裕人主端拱而已

二年二月太白犯南斗占曰兵起己丑月
犯心後星占曰豫州有災四月癸丑月犯

太微西上將巳未月犯房南第二星乙丑
歲星犯天江占曰有兵亂河津不通五月
癸未月犯左角占曰左將軍死天下有兵
壬寅熒惑犯氏占曰氏為宿宮人主憂六
月庚午熒惑犯房北第二星八月癸亥熒
惑犯南斗第五星丁巳犯建星占曰為兵
九月壬午熒惑犯哭星又犯泣星是年二
月甲戌司馬國璠等攻沒弋陽又慕容超
侵略徐兗三年正月又寇北徐州至下邳

十一月司徒王謚薨四年正月武陵王遵
薨五年慕容超復寇淮北四月劉裕大軍
討之拔臨朐又圍廣固拔之

三年正月景子太白晝見在奎二月庚申
月奄心後星占同上五月癸未月犯左角
巳丑太白晝見在參占曰益州有兵喪臣
疆八月巳卯太白犯左執法辛卯熒惑犯
左執法九月壬子熒惑犯進賢星是年八
月劉敬宣伐蜀不剋而旋四年二月左僕

射孔安國卒七月司馬叔璠等攻沒邽山
魯郡太守徐邕破走之姚略遣眾征赫連
勃勃大為所破五年劉裕討慕容超滅之
四年正月庚子熒惑犯天關五月丁未月
奄斗第二星壬子填星犯天廩占曰天下
饑倉粟少六月己丑太白犯太微西上將
乙卯又犯左執法十月戊子熒惑入羽林
占悉同上五年劉裕討慕容超後南北軍
旅運轉不息

五年二月甲子月犯昴占曰胡不安天子
破匈奴五月戊戌歲星入羽林九月壬寅
月犯昴十月熒惑犯氏閏月丁酉月犯昴
辛亥熒惑犯鉤鈴己巳月奄心大星占曰
王者惡之是年四月劉裕討慕容超十月
魏王圭遇弒殂六年五月盧循逼郊旬宮
衛被甲

六年三月丁卯月奄房南第二星災在次
相己巳又奄斗第五星占曰斗主吳吳地

兵起太白犯五諸侯占曰諸侯有誅五月
甲子月奄斗第五星巳亥月奄昴第三星
占曰國有憂一曰有白衣之會六月巳丑
月犯房南第二星甲午太白晝見七月巳
亥月犯輿鬼占曰國有憂一曰秦有兵八
月壬午太白犯軒轅太星甲申月犯心前
星災在豫州景戌月犯斗第五星占同上
丁亥月奄牛宿南星占曰天下有大誅乙
未太白犯少微景午太白在少微而晝見

九月甲寅太白犯左執法丁丑填星犯畢
占曰有邊兵是年三月始興太守徐道覆
反四月盧循寇湘中沒巴陵率眾逼京畿
是月左僕射孟昶懼王威不振仰藥自殺
七年十二月劉蕃梟徐道覆首杜慧度斬
盧循並傳首京都八年六月劉道規卒時
爲豫州刺史八月皇后王氏崩九月交州
刺史劉蕃尚書左僕射謝混伏誅劉裕西
討劉毅斬首徇之十二月遣益州刺史朱

齡石伐蜀

七年四月辛丑熒惑入輿鬼占曰秦有兵
一曰雍州有災六月太白晝見在翼巳亥
填星犯天關占曰臣謀主八月太白犯房
南第二星十一月景子太白犯哭星其七
月朱齡石剋蜀蜀又反討滅之

八年七月癸亥月奄房北第二星巳未月
犯井鉞八月戊申月犯泣星十月辛亥月
奄天關占曰有兵十一月丁丑填星犯東

井占曰大人憂十一月癸卯填星犯井鉞
是年八月皇后王氏崩九年誅劉蕃謝混
討滅劉毅十二月朱齡石滅蜀

九年二月熒惑入輿鬼占曰有兵喪太白
犯南河占曰兵起五月壬辰太白犯右執
法晝見七月庚午月奄鉤鈐占曰喉舌臣
憂九月庚午歲星犯軒轅大星巳丑月犯
左角時劉裕擅命兵革不休十年裕討司
馬休之王師不利休之等奔長安

十年正月丁卯月犯畢占曰將相有以家
坐罪者二月巳酉月犯房北星五月壬寅
月犯牽牛南星乙丑歲星犯軒轅大星占
悉同上六月景申月奄氐占曰將死之國
有誅者七月庚辰月犯天關占曰兵起熒
惑犯井鉞填星犯輿鬼遂守之占曰大人
憂宗廟改八月丁酉月奄牽牛南星占同
上九月填星犯輿鬼占曰人主憂丁巳太
白入羽林十二月巳酉月犯西咸占曰有

陰謀十一年林邑寇交州距敗之

十一年三月丁巳月入畢占曰天下兵起
一曰有邊兵巳卯熒惑入輿鬼閏月景牛
填星又入輿鬼占曰為大疫為亂臣五
月癸卯熒惑入太微甲辰犯右執法六月
巳未太白犯東井占曰秦有兵戊寅犯輿
鬼占曰國有憂七月辛丑月犯畢占同上
八月壬子月犯氐占同上庚申太白順行
從右掖門入太微丁卯奄左執法十一月

癸亥月入畢占同上乙未月入輿鬼而暈
十二年五月甲申歲星留房心之間宋之
分野始封劉裕為宋公六月壬子太白順
行入太微右掖門己巳月犯畢占同上七
月月犯牛宿十月景戌月入畢

十三年五月景子月犯軒轅丁亥犯牽牛
癸巳熒惑犯右執法八月己酉月犯牽牛
丁卯月犯太微占曰人君憂九月壬辰熒
惑犯軒轅十月戊申月犯畢占悉同上月

犯箕占曰國有憂甲寅月犯畢占同上乙
卯填星犯太微留積七十餘日占曰女君
之戒壬戌月犯太微

十四年三月癸巳太白犯五諸侯五月庚
子月犯太微七月甲辰熒惑犯輿鬼占曰
秦有兵又為旱為兵喪亦曰大人憂宗廟
改亦為亂臣時劉裕擅命軍旅數興饑旱
相屬其後卒移晉室丁巳月犯東井占曰
軍將死八月甲子太白犯軒轅癸酉填星

入太微犯右執法因留太微中積二百餘日乃去占曰填星守太微亡君之戒有徙王九月乙未太白入太微犯左執法丁巳入太微占曰大人憂十月甲申月入太微癸巳熒惑入太微犯西蕃上將仍順行至左掖門內留二十日乃逆行義熙十二年七月劉裕伐姚泓十三年八月擒姚泓司兖秦雍梁平十四年劉裕還彭城受宋公十一月左僕射前將軍劉穆之卒明年西

虜寇長安雍州刺史朱齡石諸軍陷涇官軍捨而東十二月帝崩

恭帝元熙元年正月景午三月壬寅五月景申月皆犯太微占悉同上乙卯辰星犯軒轅六月庚辰太白犯太微七月巳卯月犯太微太白晝見自義熙元年至是太白經天者九月蝕者四皆從上始革代更王臣失君之象也是夜太白犯哭星十二月丁巳月入太白俱入羽林

二年三月庚午填星犯太微占悉同上元
年七月劉裕受宋王是年六月帝遜位于
宋

妖星客星

魏文帝黃初三年九月甲辰客星見太微
左掖門內占曰客星出太微國有兵喪十
月帝南征孫權是後累有征役

六年十月乙未有星孛于少微歷軒轅占
為兵喪除舊布新之象時帝軍廣陵辛丑

親御甲冑觀兵明年五年帝崩

明帝太和六年十一月景寅有星孛于翼
近太微上將星占曰為兵喪甘氏曰孛彗
所當之國是受其殃翼又楚分野孫權封
略也明年權有遼東之敗又明年諸葛亮
入秦川孫權發兵緣江淮屯要衝權自圍
新城以應亮天子東征權

青龍四年十月甲申有星孛于大辰長三
尺乙酉又孛于東方十一月己亥彗星見

犯宦者天紀星占曰大辰為天王天下有喪劉向五紀論曰春秋星孛于東方不言宿者不加宿也宦者在天市為中外有兵天紀為地震孛彗主兵喪

景初元年六月地震九月吳將朱然圍江夏皇后毛氏崩二年正月討公孫文懿三年正月明帝崩

景初二年八月彗星見張長三尺逆西行四十一日滅占同上張周分野十月癸巳

客星見危逆行在離宮北騰蛇南甲辰犯宗星巳酉滅占曰客兵所出有兵喪虛危為宗廟又為墳墓客星近離宮則宮中將有大喪就先君於宗廟之象也三年正月帝崩

少帝正始元年十月乙酉彗星見西方在尾長二丈拂牽牛犯太白十一月甲子進犯羽林占曰尾為燕又為吳牛亦吳越之分太白為上將羽林中軍兵為吳越有喪

中軍兵動二年五月吳遣三將寇邊吳太子登卒六月宣帝討諸葛恪於皖太尉滿寵薨

六年八月戊午彗星見七星長二尺色白進至張積二十三日滅七年十一月癸亥又見軫長一尺積百五十六日滅九年三月又見昴長六尺色青白芒西南指七月又見翼長二尺進至軫積四十二日滅案占曰七星張為周分野翼軫為楚昴為趙

魏彗所以除舊布新主兵喪也嘉平元年宣帝誅曹爽兄弟及其黨與皆夷三族京師嚴兵三年誅楚王彪又襲王凌於淮南淮南東楚也魏諸王幽於鄴

嘉平三年十一月癸亥有星孛于營室西行積九十日滅占曰有兵喪室為後宮後宮且有亂

四年二月丁酉彗星見西方在胃長五六丈色白芒南指貫參積二十日滅

五年十一月彗星又見軫長五丈在太微左執法西東南指積百九十日滅案占胃兗州之分野參主兵太微天子庭執法為執政李彗為兵喪除舊布新之象正元元年二月李豐豐弟翼后父張緝等謀亂皆誅皇后亦廢九月廢帝為齊王

高貴鄉公正元元年十一月白氣出南斗側廣數丈長竟天王肅曰蚩尤之旗也東南南其有亂乎二年正月有彗星見於吳楚

分西北竟天鎮東大將軍毋丘儉等據淮南叛景帝討平之案占蚩尤旗見王者征伐四方自後又征淮南西平巴蜀是歲吳主孫亮五鳳元年也斗牛吳越分案占吳有兵喪除舊布新之象也太平三年孫綝盛兵圍宮廢亮為會稽王故國志又書於吳也淮南江東同揚州地故于時變見吳楚楚之分則魏之淮南多與吳同災是以毋丘儉以彗為已應遂起兵而敗後三年

卽魏甘露二年諸葛誕又反淮南吳遣將救之及城陷誕衆與吳兵死沒各數萬人猶前長星之應也

甘露二年十一月彗星見角色白占曰彗星見兩角間色白者軍起不戰邦有大喪景元元年高貴鄉公爲成濟所害

四年十月丁丑客星見太微中轉東南行歷軫宿積七日滅占曰客星出太微有兵喪景元元年高貴鄉公被害

元帝景元三年十一月壬寅彗星見亢色白長五寸轉北行積四十五日滅占曰爲兵喪一曰彗星見亢天子失德四年鍾會鄧艾伐蜀剋之二將反亂皆誅

咸熙二年五月彗星見王良長丈餘色白東南指積十二日滅占曰王良天子御駟彗星埽之禪代之表除舊布新之象也白色爲喪王良在東壁宿又并州之分野八月文帝崩十二月武帝受魏禪

武帝泰始四年正月景戌彗星見軫青白
色西北行又轉東行占曰為兵喪軫又楚
分野三月皇太后王氏崩十月吳寇江夏
襄陽

五年九月星孛于紫宮占如上紫宮天子
內宮十年武元楊皇后崩十年十二月有
星孛于軫占曰天下兵起軫又楚分野

咸寧二年六月甲戌星孛于氏占曰天子
失德易政氏又兖州分七月星孛大角大

角為帝坐八月星孛大微至翼北斗三台
占曰太微天子庭大人惡之一曰有改王
翼又楚分野北斗主殺罰三台為三公

三年正月星孛于西方三月星孛于胃胃
徐州分四月星孛女御女御為後宮五月
又孛于東方七月星孛紫宮占曰天下易
王

四年四月蚩尤旗見于東井後年傾三方
伐吳是其應也

五年三月星孛于柳四月又孛于女御七月孛于紫宮占曰外臣陵主柳又三河分野大角太微紫宮女御並為三者明年吳亡是其應也孛主兵喪征吳之役三河徐兗之兵悉出交戰於吳楚之地吳丞相都督以下梟戮十數偏裨行陣之徒馘斬萬計皆其徵也

太康二年八月有星孛于張占曰為兵喪十一月星孛于軒轅占曰後宮當之

四年三月戊申星孛于西南是年齊王攸任城王陵琅邪王佃新都王詠薨

八年九月星孛于南斗長數十丈十餘日滅占曰斗主爵祿國有大憂一曰孛于斗王者疾病天下易政大亂兵起

太熙元年四月客星在紫宮占曰為兵喪太康末武帝耽宴遊多疾病是月己酉帝崩永平元年賈后誅楊駿及其黨與皆夷三族楊太后亦見弒又誅汝南王亮太保

衛瓘楚王瑋王室兵喪之應也

惠帝元康五年四月有星孛于奎至軒轅
太微經三台大陵占曰奎為魯又為庫兵
軒轅為後宮太微天子庭三台為三司太
陵有積尸死喪之事其後武庫火西羌反
後五年司空張華遇禍賈后廢死魯公賈
謚誅又明年趙王倫篡位於是三王興兵
討倫兵士戰死十餘萬人

永康元年三月妖星見南方占曰妖星出
天下大兵將起是月賈后殺太子趙王倫
尋廢殺后斬司空張華又廢帝自立於是
三王並起迭總天權其十二月彗星出牽
牛之西指天市占曰牛者七政始彗出之
改元易號之象也天市一名天府一名天
子樞帝坐在其中明年趙王倫篡位改元
尋為大兵所滅

二年四月彗星見齊分占曰齊有兵喪是
時齊王罔起兵討趙王倫倫滅罔擁兵不

朝專權淫奢明年誅

太安元年四月彗星晝見

二年三月彗星見東方指三台占曰兵喪
之象三台為三公三年正月東海王越執
太尉長沙王又張方又殺之

永興元年五月客星守畢占曰天子絕嗣
一曰大臣有誅時諸王擁兵其後惠帝失

統終無繼嗣

二年八月有星孛于昴畢占曰為兵喪昴

畢又趙魏分野十月丁丑有星孛于北斗

占曰璇璣更授天子出走又曰彊國發兵

諸侯爭權是後諸王交兵皆有應明年惠

帝崩

成帝咸和四年七月有星孛于西北犯斗

二十三日滅占曰為兵亂十二月郭默殺

江州刺史劉胤荊州刺史陶侃討默斬之

時石勒又始僭號

咸康二年正月辛巳彗星夕見西方在奎

占曰為兵喪奎又為邊兵三年正月石季龍僭天王位四年石季龍伐慕容皝不剋既退皝追擊之又破麻秋時皝稱蕃邊兵之應也

六年二月庚辰有星孛于太微七年三月杜皇后崩

康帝建元元年十一月六日彗星見亢長七尺白色占曰亢為朝廷主兵喪二年康帝崩

穆帝永和五年十一月乙卯彗星見于亢芒西向色白長一丈六年正月丁丑彗星又見于亢占曰為兵喪疾疫其五年八月褚裒北征兵敗十一月冉閔殺石遵又盡殺胡十餘萬人於是中土大亂十二月褚裒薨是年大疫

升平二年五月丁亥彗星出天船在胃占曰為兵喪除舊布新出天船外夷侵一曰為大水四年五月天下大水五年穆帝崩

哀帝興寧元年八月有星孛于角亢入天
市案占曰爲兵喪三年正月皇后王氏崩
二月帝崩三月慕容恪攻沒洛陽沈勁等
戰死

海西太和四年二月客星見紫宮西垣至
七月乃滅占曰客星守紫宮臣弒主六年
桓溫廢帝爲海西公

孝武寧康二年正月丁巳有星孛于女虛
經氏角亢軫翼張至三月景戌彗星見於

氏九月丁丑有星孛于天市占曰爲兵喪
太元元年七月符堅破涼州虜張天錫
太元十一年三月客星在南斗至六月乃
沒占曰有兵有赦是後司雍究異常有兵
役十二年正月大赦八月又大赦

十五年七月壬申有星孛于北河或經太
微三台文昌入北斗色白長十餘丈八月
戊戌入紫宮乃滅占曰北河或一名胡門
胡門有兵喪婦太微入紫微王者當之三

台爲三公文昌爲將相將相三公有灾入
北斗諸侯戮一曰掃北斗彊國發兵諸侯
爭權大人憂二十一年帝崩隆安元年王
恭殷仲堪桓玄等並發兵表以誅王國寶
爲名朝廷順而殺之并斬其後弟緒司馬
道子由是失勢禍亂成矣

十八年二月客星在尾中至九月乃滅占
曰燕有兵喪二十年慕容垂息寶伐魏爲
所破死者數萬人二十一年垂死國遂衰

亡

二十年九月有蓬星如粉絮東南行歷女
虛至哭星占曰蓬星見不出三年必有亂
臣戮死於市是時王國寶交構朝廷二十
一年九月帝崩隆安元年王恭等興兵而
朝廷殺王國寶王緒

安帝隆安四年二月己丑有星孛奎長三
丈上至閣道紫宮西番入北斗魁至三台
三月遂經于太微帝坐端門占曰彗星掃

天子庭閣道易主之象經三台入北斗占
同上條十二月戊寅有星孛于貫索天市
天津占曰貴臣獄死内外有兵喪天津為
賊斷王道天下不通案占灾在吳越五年
二月有孫恩兵亂攻侵郡國於是内外戒
嚴營陣屯守柵斷淮口九月桓玄表至逆
旨陵上其後玄遂篡位亂京都大饑人相
食百姓流亡皆其應也

元興元年十月有客星色白如粉絮在大
微西至十二月入太微占曰兵入天子庭
二年十二月桓玄篡位放遷帝后於尋陽
以永安何皇后為零陵君三年二月劉裕
盡誅桓氏

義熙十一年五月甲申彗星二出天市婦
帝坐在房心北房心宋之分野案占得彗
柄者興除舊布新宋興之象

十四年五月庚子有星孛于北斗魁中七
月癸亥彗星出太微西柄起上相星下芒

漸長至十餘丈進掃北斗紫微中台占曰
彗出太微社稷亡天下易王入北斗紫微
帝宮空十四年劉裕還彭城受宋公十二
月帝崩

恭帝元年正月戊戌有星孛于太微西蕃
占曰革命之徵其年宋有天下

星流墮

蜀後主建興十三年諸葛亮帥大衆伐魏
屯于渭南有長彗赤而芒角自東北西南

流投亮營三投再還往大還小占曰兩軍
相當有大流星來走軍上及墜軍中者皆
破敗之徵也九月亮卒于軍焚營而退群
帥交怨多相誅殘

魏明帝景初二年宣帝圍公孫文懿於襄
平八月景寅夜有大流星長數十丈白色
有芒鬣後首山東北流墜襄平城東南占
曰圍城而有流星來走城上及墜城中者
破又曰星墜當其下有戰場又曰凡星所

墜國易姓九月文懿突圍走至星墜所被
斬屠城坑其衆

元帝景元四年六月有大流星二並如斗
見西方分涑南北光照地隆隆有聲案占
流星為貴使星大者使大是年鍾鄧尅蜀
二星蓋二帥之象二帥相背又分涑南北
之應鍾會既叛三軍憤怒隆隆有聲兵將
怒之徵也

武帝泰始四年七月星墜如雨皆西涑占
曰星墜為百姓叛西流吳人題晉之象也
二年吳夏口督孫秀率部曲二千餘人來
降

太康九年八月壬子星墜如雨劉向傳云
下去其上之象後三年帝崩而惠帝立天
下自此亂矣

惠帝元康四年九月甲午枉矢東北行竟
天

六年六月景午夜有枉矢自斗魁東南行

案占曰以亂伐亂北斗主執殺出斗魁居中執殺者不直之象也是後趙王殺張裴廢賈后以理太子之寃因自篡盜以至屠滅以亂伐亂之應也一曰氏帥齊萬年反之應也

太安二年十一月辛巳有星晝墮中天北下光變白有聲如雷案占名曰營首營首所在下有兵流血明年劉元海石勒攻略并州多所殘滅王浚起燕代引鮮卑攻

掠鄴中百姓塗地有聲如雷怒之象也

永興元年七月乙丑星隕有聲

二年十月星又隕有聲占同上是後遂亡中夏

光熙元年五月枉矢西南涼是時司馬越西破河間兵奉迎大駕尋收繆胤何綏等肆無君之心天下惡之及死而石勒焚其屍柩是其應也

懷帝永嘉元年九月辛卯有大星如日自

西南流于東北小者如斗相隨天盡赤聲如雷占曰流星為貴使星大者使大是年五月汲桑殺東燕王騰遂據河北十一月始遣和郁為征北將軍鎮鄴西田甄等大破汲桑斬于樂陵於是以甄為汲郡太守弟蘭鉅鹿太守小星相隨者小將別帥之象也司馬越忿魏郡以東平原以南皆黨於桑以賞甄等於是侵掠桑地有聲如雷忿怒之象也

四年十月庚子大星西北墜有聲尋而帝蒙塵于平陽

元帝太興三年四月壬辰枉矢出虛危沒翼軫占曰枉矢所觸天下之所伐翼軫荆州之分野太寧二年王敦殺譙王承及甘卓而敦又梟夷枉矢觸翼之應也

永昌元年七月甲午有流星大如彗長百餘丈青赤色從西方來尾分為百餘岐或散時王敦之亂百姓流亡之應也

成帝咸康三年六月辛未流星大如二斗
魁色青赤光耀地出奎中沒婁北案占為
饑五穀不藏是月大旱饑

六年二月庚午朔有流星大如斗光耀地
出天市西行入太微占曰大人當之八年
六月成帝崩

穆帝永和八年六月辛巳日未入有流星
大如三斗魁後辰巳上東南行昴度推之
在箕斗之間蓋燕分也案占為營者營首

之下流血滂沱是時慕容雋僭稱大燕攻
伐無已

十年四月癸未流星大如斗色赤黃出織
女沒造父有聲如雷占曰燕齊有兵百姓
流亡其年十二月慕容雋遂據臨潼盡有
幽并青冀之地緣河諸將奔散河津隔絕
慕容恪攻齊

升平二年十二月枉矢自東南流于西北
其長半天四年十月庚戌天狗見西南占

曰有大兵流血

海西太和四年十月壬申有大流星西下有聲如雷明年遣使免袁真爲庶人桓溫征壽春真病死息瑾代立求救於苻堅溫破苻堅軍六月壽春城陷

孝武太元六年十月乙卯有奔星東南經翼軫聲如雷占曰楚地有兵軍破百姓流亡十二月苻堅荆州刺史梁成襄陽太守閻震率衆伐竟陵桓石虔擊大破之生擒

震斬首七千獲生口萬人聲如雷將帥怒之象也

十三年閏月戊辰天狗東北下有聲占曰有大戰流血自是後慕容垂翟遼姚萇苻登慕容永並阻兵爭疆十四年正月彭城妖賊又稱僞號於皇丘劉牢之破滅之三月張道破合鄉太山向欽之擊走之

安帝隆安五年三月甲寅流星赤色衆多西行經牽牛虛危天津閣道貫太微紫宮

占曰星庶人類衆多西行衆將西流之象
經天子庭主弱臣彊諸侯兵不制其年五
月孫恩侵吳郡殺內史六月至京口於是
內外戒嚴營陣屯守劉裕追破之元興元
年七月大饑人相食浙江以東流亡十六
七吳郡吳興戶口減半又流奔而西者萬
計十月桓玄遣將擊劉軌破走之軌奔青
州

雲氣

惠帝永興元年十二月壬寅夜有赤氣亘
天砰隱有聲

二年十月丁丑赤氣見北方東西竟天占
曰並爲大兵砰隱有聲怒之象也是後四
海雲擾九服交兵

光熙元年十二月甲申有白氣若虹中天
北下至地夜見五日乃滅占曰大兵起明
年王弥起青徐汲桑亂河北毒流天下
懷帝永嘉三年十二月乙亥有白氣如帶

出南北方各二起地至天貫參伐中占曰
天下大兵起四年三月司馬越收繆胤等
又三方雲擾攻戰不休五年三月司馬越
死於甯平城石勒攻破其衆死者十餘萬
人六月京都焚滅帝如虜庭
愍帝建興元年十月己巳夜有赤氣曜於
西北荊州刺史陶侃討杜弼之黨於石城
戰敗

志第三 晉書十三

音義

捷閉

其輦反又其偃反

甄氏

音虓許交真虓反

胸

音鬣良

反繆胤

音謬碎

音耕他高反弼

1874

1874

1874

